

四庫全書

史部

欽定四庫全書

史部

欽定盛京通志卷一百二十九

三十一

侍郎臣劉躍雲覆勘

總校官編修臣朱鈴

欽定四庫全書

欽定盛京通志卷一百二十九

國朝藝文

十五

奏疏

欽定四庫全書

欽定盛京通志卷一百二十九

國朝藝文

十五

疏

敬陳奉天邊地情形疏

順治丁亥

張尚賢

盛京形勢自

興京至山海關東西千餘里開原至金州南北亦千餘里又有河東河西之分以外而言東北起開原

由西南至黃泥窪牛莊乃明季昔日邊防自牛莊
由三岔河南至蓋州復州金州旅順轉而東至紅
嘴歸復黃骨島鳳凰城鎮江鴨綠江口皆明季昔
日海防此河東邊海之大畧也河西自山海關以
東至中前所前屯衛後所沙河寧遠連山塔山杏
山松山錦州大凌河北面皆邊南面皆海所謂一
條邊耳獨廣寧一城南至閭陽驛十三山站右屯
衛海口相去百餘里北至我

朝新插之邊相去數十里東至盤山驛高平沙嶺以
至三岔河之馬圈此河西邊海之大畧也合河東
河西之邊海以觀之黃沙滿目一望荒涼倘有奸
宄暴發海寇突至猝難捍禦此外患之可慮者以
內而言河東城堡雖多皆成荒土獨奉天遼陽海
城三處稍成府縣之規而遼海兩處仍無城池如
蓋州鳳凰城金州不過數百人鐵嶺撫順唯有流
徒諸人不能耕種又無生聚隻身者逃去大半畧

有家口者僅老死此地實無益於地方此河東腹裏之大略也河西城堡更多人民希少獨寧遠錦州廣寧人民湊集僅有佐領一員不知於地方如何料理此河西腹裏之大略也合河東河西腹裏以觀之荒城廢堡敗瓦頽垣沃野千里有土無人全無可恃此內憂之甚者臣朝夕思維欲弭外患必當籌畫隄防欲消內憂必當充實根本務宜設卡添兵屯田廣儲以圖久遠之策

永陵工程告竣疏

雍正庚戌

平郡王福彭

臣等奉

旨敕交福建總督高其倬奏摺內開欽遵

聖旨恭瞻

永陵形勢其龍與長白分榦勢由納綠起祖高冠羣山秀
出天表備尊雄穎麗之觀光景耀日極遙迤頓跌
之妙氣槩驚人蘇子洪河當前遠抱渾河巨浸在
後滌環千里大會之山作朝作護萬仞北辰之燄

鎮水鎮垣更有欽異者

寶城之內嘉樹挺出玉砌之旁靈根蟠結狀若旋龍堅同

磐石所有

陵所殿闕營建規模詳細瞻視俱屬妥合惟前面左邊廂

房五間應行補葺右邊相配始為勻稱

陵西小河一道夏日水長漫上行路俱遠右手山脚而行

宜修一小堤攔水護路再將此路修理微高俾夏
月可以通行其山脚遠行之路禁止行走方為妥

協等因具奏奉

旨命臣等敬謹辦理欽此臣等遵於五月二十四日照欽

天監選擇吉日吉時敬謹動土隨恭詣

祖陵目覩夏秋水長情形誠有如高其倬所奏應築護路

攔水小堤并將此路修令微高俾夏月水長之時

資其攔護往來得以通行不致遠踐山脚實為妥

協再添蓋廂房重加丹雘兩相勻稱更覺整肅隨

將料估應築石堤石橋攔水壩並填墊道路丈尺

添蓋右邊廂房修飾左邊廂房等項需用物料匠夫工價銀兩數目繕摺請

旨准行在案今照原估建築石堤若干丈堤中建修通水三洞石橋一座攔水壩一道長若干丈修墊河邊道路長若干丈高若干尺添蓋右邊廂房五間修飾左邊廂房五間以上各工俱經告竣共計用銀若干兩此項銀已在領到

福陵堤工銀兩內動用修造其用過銀兩修造清冊併將

所修式欵敬謹繪圖恭

呈

御覽欵惟我

皇上

大德大孝

至聖至誠

篤本溯源時時切

橋山之望

推恩錫類念念廣親愛之仁茲以

祖陵工程關係重大

特命臣等敬謹修理臣聞

命之下彌深悚懼仰賴

聖訓諄諄多方

指示敢不竭誠率屬務圖修理堅固以仰副

皇上至孝至誠鄭重

祖陵之至意臣於抵工之日會同將軍臣那蘇圖仰遵

聖諭宣布

皇仁敬率在工人負潔誠辦理凡物料工價俱按實數發給一時父老歡騰已徵羣心之愛戴工商輻輳更
沐

膏澤之殷流熙熙而來攘攘而往欣看喜色而爭先約之
閣閣椽之索索遙聽歡聲而恐後方謂經始之勿
亟載觀大工之告成蓋由

睿慮精詳事事斟酌於美善可傳可法實係

聖恩浩蕩念念淹浹於肌髓必信必從此我

皇上誠孝之極至所以格

天人通上下洵為千古未有之

一人而非臣等所能仰贊其

高深者也臣等於工程告竣之日恭瞻

祖陵有輔有翼煥然天表之巍巍如砥如矢坦如王道之

蕩蕩不惟規模鴻整亦且結構精嚴究氣局之宏

深既竒秘而清晰瞻形勢之廣大復博厚而高明

八極入於照臨具涵蓋八表之象萬國供其驅策
有包羅萬象之規允為諸吉之並鍾洵稱萬善之
全備且喜工竣次日大雪即降銀花映

寶城千百年之嘉樹愈榮而愈潤珠光籠玉砌億萬歲之

靈根彌固而彌長幸際

盛世之昌明共慶豐年於有象益徵

天心之眷佑永綿

寶算於無疆矣

福陵工程告竣疏

雍正庚戌

平郡王福彭

滿漢文武大臣等敬議奏福建總督高其倬等疏
稱欽遵

聖旨恭瞻

福陵形勢其龍興

永陵共祖同源分宗抽榦發自長嶺之西行於渾河之北

順水而來張潮而結始聳萬仞之峯獨超羣嶺繼
聯百尺之阜迥異平巒綿亘則虹轉雲舒昂頓則

龍翔鳳舉遠極諸邊無峯不拱內際巨海無水不收益

天地眷佑極精微廣大之全功故山谷鍾靈毓

文武聖神之遐福允屬上格之龍實為最善之地惟前面
水法稍更故道水由夏日溢口而流弓抱之勢微
覺外張必須修建石堤順導河流俾循故道則水
抱砂圓益增吉慶等因具奏奉

旨特命臣等敬謹定議臣等公同敬謹確議應如高其倬

等所奏將左畔水法復遵故道將原日河身淤淺之處挑濬寬深應修石工即行修理仰祈

皇上欽點大臣一員並

敕下工部遴選才能官二員督率前往料估建造使水法仍遵故道石工永致堅凝等因具奏奉

旨命臣前往會同奉天將軍那蘇圖敬謹督理欽此臣面
奉

上諭

福陵前面河身應填之處令臣等敬謹詳酌臣遵

旨即帶領欽天監博士劉毓圻敬謹相視據稱

陵前河窪之處最宜培墊方為宏敞等語復

命高其倬議定填河取土方向並挑挖引河導令山溝小

水五道會流環抱遶過

陵前歸入大河於地法合宜等因具奏一併交與臣等敬

謹辦理臣隨赴工所恭照欽天監選擇吉日吉時

於雍正八年五月二十四日動土謹將工程需用

物料匠夫工價等項行文工部取到部例敬謹遵
照詳核所有料估各項銀兩數目陸續繕摺請

旨准行欽遵在案今敬謹查得所築迎水順水石堤長若
千丈攔水壩一道長若干丈又挑引河一道長若
千丈左右引水小溝二道共長若干丈其填河工
程遵照原議將原河兩岸高下不平之處均徹平
坦各處土坎修成漫坡填墊河身運用挖河取出
之土並河崖邊及十里外之土若干方俱經填墊

妥適以上各工原料估銀若干兩今實用過銀若干兩未用銀若干兩今備造清冊併將所修式款
敬謹繪圖恭

呈

御覽欽惟我

皇上

大孝性成

至誠天授

善繼善述克紹

皇祖之心傳

丕顯丕承宏開萬代之謨烈

光華被四表惟精惟一彌深宵旰之勤

恬冒遍萬方曰寬曰仁益懋中和之治雖

聖主不言祥瑞而

皇極必有休徵雲慶河清悉皆

聖德之洋溢靈芝蒼草益彰

積累之宏深茲以

祖陵發祥之地風水攸關

聖人報本之思疇咨倍切

特命臣等敬謹修理臣赴工之時而領

訓諭

祖陵工程關係重大汝往欽承辦理勿省工勿惜費董率在工人負各宜潔誠襄事罔不祇肅惟時工程堅固人心豫悅其無負敬

祖愛民之至意欽此臣膺茲重任彌切悚惶及抵工所會

同將軍臣那蘇圖仰體

聖懷廣宣

德意敬率在工人負矢誠矢慎敬謹修理一時在工人負

靡不人人思奮竭力攢辦凡一應物料工價俱按

實數給發是以萬姓歡騰咸若子來之趨事千厯

雲集倍覺市利之充盈踴躍以赴

皇工罔不欣欣而相告絡繹以沾

聖澤悉皆蕩蕩而難名臣等興工伊始伏念工程浩大恒恐急緩以稽時及督理經營悉遵

指示周詳竊幸功成於不日此皆我

皇上一人之大孝人人莫不興孝合天下之孝以同襄尊親之大典

皇上一人之至誠人人莫不抒誠合天下之誠以共慰敬祖之深衷此誠聖帝明王千古未有之

一人非臣等所能仰贊於萬一者也臣等於工程告竣之

日恭瞻

祖陵水循故道依然壁合而珠圓隄慶安瀾儼如龍蟠而
鱗集障溢流而環抱方知萬派之朝宗引羣瀆而
歸源更見千條之共貫為高為下載觀奠安之均
平有齒有唇永保岡陵於無替瞻案山之拱向千
官整肅以來朝仰

明堂之恢宏萬馬騰驤而侍衛合宇宙清寧之氣萃聚特
鍾擅山川靈秀之奇包羅萬象固已廣大悲備更

覺悠久無疆且幸工成次日即降大雪瑞暄應時

羣識

天顏之有喜豐年兆象預徵嘉穀之頻登遐邇懽呼同聲
而歌萬年之頌

天人慶幸稽首而上大有之書從此千百年

景運宏昌快覩

金甌之鞏固億萬世

鴻圖永久愈卜

寶錄之綿長矣

請禁

福陵風水禁地後諸小道車輛私行繞走議

乾隆丙辰

莊親王允祿

據多羅淳郡王等奏

福陵後小道有關風水請禁止外來車輛私行繞走等因

一摺奉

旨總理事務王大臣議奏欽此臣等伏查雍正元年十

二月內平郡王面奉

世宗憲皇帝諭旨

福陵紅門前大路與

寶城甚近車馬俱由山根左畔行走有關風水著行文奉
天將軍府尹嗣後於渾河東南西南無關風水之處設
立船隻以便行人車馬擺渡

紅門前大路及山根左畔巖行禁走欽此欽遵隨經該府
尹等設立渡船具題在案今據淳郡王等奏稱渾

河東南西南原各設渡船兩隻以濟往來今石廟
興隆店二處渡口現有車馬擺渡惟因

陵後來龍原有地名水泉長嶺一帶向係村民出入之小
道與兩處渡口路徑相通且較之前路稍近亦有
車輛竟從

陵後往來者正係

陵後龍身應令該管官兵嚴行禁約其往來車馬行人俱
令由前定之兩處渡口行走至

陵後小道除該地村民仍聽其出入自便外如再有外來車輛私行者不時查禁等語應如淳郡王等所奏令奉天將軍嚴行禁約其往來車馬行人俱令由前定之兩處渡口行走至

陵後小道除該地村民仍聽出入外如再有外來車輛私行繞走者即令該管官兵嚴拿懲治至所奏原設水手嚴禁勒索並於冬初春初搭蓋橋梁以免留滯之處亦應照所奏交該府尹並

盛京工部料理

福陵前隄工議

乾隆丙辰

莊親王允祿

據多羅淳郡王等奏稱

福陵隄工前經

臣

等帶同洪文瀾等悉心相度酌修土隄

開寬引河培墊中心包鑲石岸逐一料估造冊繪

圖等因具

奏嗣於本年三月二十九日接准部咨總理王大臣

等議覆謹案圖內洪文瀾等標出改修之處雖據

淳郡王會同那蘇圖等奏稱誠為至善等語但

祖陵工程關係重大必須慎重妥酌期於萬全方於風水工程兩有裨益查雍正八年修理

陵工原係高其倬前往相度今高其倬已奉

旨來京請俟高其倬到日將所奏圖摺令伊閱看或應照淳郡王等所奏修理或其中應有酌量更改之處臣等再會同定議具奏等因奉

旨是依議欽此欽遵今於四月十四日又接准部咨總

理王大臣等議覆高其倬到京將淳郡王等所奏
圖摺與伊閱看并詳悉詢問議得上年淳郡王等
奏請於頭隄上流之雞心灘開深溝三道本年淳
郡王等照洪文瀾所看議倬今據高其倬議稱雞
心灘應仍其自然不宜開動南岸亦與此相同不
宜疏鑿等語應照所議雞心灘倬其挑挖大河南
岸倬其開寬又上年淳郡王等奏三隄外加築攔
水壩一道本年又奏應照原估加築計長六十丈

又上年淳郡王等奏請於頭隄之下建築石壩外
砌攔水壩本年又議改築土隄長一百六十丈照
攔水壩式樣密立排樁中實以土隄東再加土壩
斜長三十一丈以護隄頭其隄頭背後應用排樁
一路用土鑲墊長二百八十一丈一尺九寸今高
其倬議稱決口若建石隄雖禦水有力恐其勢過
強挑水南沖有損南岸應建土隄外加排樁護掃
既可捍禦北面又不致有損南砂並應於雨多水

大之時加意防護仍令歲修是為合宜其舊設隄
背後外加椿埽防貼內應用土填培等語查上年
決口原係從前高其倬所看無庸修建石工之土
岡今高其倬所議決口建築土隄外加排椿護埽
各工與淳郡王等本年所奏相符應照淳郡王等
所奏修理其將來如何防護歲修之處臣福彭從
前修工時曾將歲修防護奏明交該將軍等料理
應令淳郡王等於工竣時查照臣福彭原奏交該

將軍會同工部歲修防護又上年淳郡王等原奏
開濬引河南岸止寬五丈本年議開寬六十丈又
奏五皮石岸之南地勢低窪而引河北岸有天然
土岡欲於東西兩邊包砌石砌岸共長三百丈緊
接天然土岡以防坍塌下面填墊水窪長三百丈
上面鑲墊一律平高長三百八十一丈以補內堂
今據高其倬議將虎皮石岸前所沖水坑亦應用
土填平兩旁包砌石岸俱宜低不宜高應比虎皮

石墻低二尺五寸上面仍宜用土蓋培成天然小
按之形其引河南岸洪文瀾議開六十丈亦為過
寬原議開寬五丈亦覺少窄今酌議向南開寬十
二丈作為月牙之形向內弓抱其土培作北面圓
唇詳酌形勢應如洪文瀾所議修培但所開不宜
太寬所培務宜圓靜其水沖溝流之處俱宜培平
如舊等語高其倬所議開濬引河墊填水坑包砌
石岸與淳郡王等所奏相同惟是所開引河高其

俾議開寬十二丈應令淳郡王等俱照高其俾所
議另行酌估修理至於淳郡王所奏接築土隄鑲
填隄後以及培墊低窪之處俱用挑挖引河之土
所有馬關橋之土不宜取動引河頭之汀不宜填
墊等項與高其俾所議相合俱應照所奏行酌改
工程應令另行估計核實造冊具奏等因奉

旨是依議欽此欽遵各知照前來臣等謹查

福陵水法原係高其俾於雍正七年定議建築茲因衝刷

興修雖派有洪文瀾等數員先後相度深恐識見
參差未能畫一今又經原議之高其俾再三斟酌
臣等接准部咨細繹廷議所有酌量更改之處自
應另行估計但查洪文瀾等議修各工臣等料估
錢糧三十八萬五千七百餘兩內因建築決口頭
隄背後以及石砌岸培墊等處共長九百一十三
丈一尺九寸在在需土鑲填共計需用土十八萬
五千八百六十方估計填墊挑挖車運價銀三十

四萬一千二百十兩六錢其餘磚石灰椿匠夫襍料僅估銀四萬四千五百六十七兩七錢四分零因土方十居其九彼時議將引河開寬六十丈即以挑挖引河之土運為各處之需業經臣等前摺聲明在案今查應行修建各處高其倬與洪文瀾等所議俱屬相符惟將石砌岸比虎皮石墻酌低二尺五寸引河止開十二丈雖各有應減物料錢糧而土方需用尚多今河開十二丈則少開河四

十八丈即少得土四十八丈矣且高其倬議稱用土培作北面圓唇又云所培務宜圓淨則前估礮岸必須纖毫妥合方為盡善臣等公同親往敬謹相度查得前估石礮岸原比虎皮石牆低二尺今照高其倬議再低五寸但查上面培補一律平高誠恐中間存積雨水自應南北畧分高低北頭低二尺五寸者南頭即應低三尺五寸則唇圓而雨水亦不致存積再洪文瀾原議西邊露明流水

山溝一道讓在石礮岸外今照高其倬議欲圓淨
則此處不無缺凹應如砌石幫上下鋪墁石板作
為暗溝俾水由內洩則東西一望整齊而觀瞻倍
肅惟是原估需用土十八萬五千八百六十方除
石礮岸內減用土五萬一千一百二十六方七釐
尚需用土十三萬四千七百三十三方九分三釐
今引河十二丈內僅可得土三萬五千四百八十
七方八分四釐實少土九萬九千二百四十六方

九釐查引河南岸儘有土岡在洪文瀾原議河心淤積之土可以愈開愈寬得與大河相通高其俦則議中間一砂內闕小灘外攔大河最為得力若馬關橋之土不宜取動勢必於橋外極西遠處取土運送到工計程十里內外運價浩繁惟有引河南岸所積淤土數處與中砂相去尚遠若酌量地勢接聯分別道路里數可以均撤平坦即能得土九萬九千餘方隨交與郎中那禪等核實料估計

土方填墊挑挖車運價銀二十三萬六千五百四十八兩二錢五分二釐磚石灰椿匠夫襍料銀五萬一千零七兩五錢四分四釐六毫二共銀二十八萬七千五百五十五兩七錢九分六釐六毫臣等覆核無異伏思

陵前地土關係綦重今需用土方雖經臣等酌議數處但可否取用有無關碍非經熟悉風水之員斟酌指定未可擅動理合繪圖敬將取土各處貼簽備造

黃冊進呈

御覽仰懇

皇上敕下原勘風水各員按圖定議如議無闕碍臣等
謹俟部文到日遵照辦理再查原估決口需用排
椿石圍頭隄背後需用排椿實土今高其倬有外
加護掃防貼之議查掃箇需用葦束不如石圍之
能經久臣等應請仍照原估修理又臣等前摺奏
明原估決口河身衝刷舊壩以及西南決溜隄中

土岡各處俱無庸填墊修補今查此內西南決溜
因引河開寬十六丈則決溜自可無虞今既指開
十二丈則衝決溜口仍應堵築臣等謹合詞具
奏伏乞

皇上睿鑒施行再臣等於四月初一日動土今因接准
部咨現在先築決口次第興修合併陳明等因奉
旨總理事務王大臣議奏欽此臣等謹議得淳郡王等
奏稱

福陵應行修建各處工程高其倬與洪文瀾等所議俱屬
相同惟洪文瀾原議流水山溝一道若照高其倬
務宜圓淨之議不無缺凹應如砌石幫上下鋪墁
石板作為暗溝再土方需用十三萬四千七百有
餘今所開引河十二丈內止可得土三萬五千四
百餘方尚少土九萬九千餘方雖經臣等酌議數
處取用但有無關碍風水非經熟悉之員斟酌指
定未敢擅動等語臣等隨傳問洪文瀾管志寧據

洪文瀾稱謹敬詳慎河工奏摺并圖樣將修理明堂平整之餘土平墊北面之圓唇實屬可行但工程關係重大不敢據圖即定現在管志寧前往

盛京可以親赴工所詳酌修培至於內堂出水之處今議用石鋪墁作為暗溝於風水有關應照原議修理等語管志寧與洪文瀾同查

福陵工程關係重大應否取土之處尤宜詳慎應令管志

寧到

盛京日斟酌詳慎至內堂出水之處洪文瀾既稱不
便用石鋪墁亦應交與管志寧一併定議又稱原
估決口需用排椿石囤頭隄背後需用排椿實土
今高其倬有外加護掃防貼之議查掃過需用葦
束不如石囤經久請仍照原估修理等語查葦束
自不如石囤之經久應如所奏仍照原估修理又
稱原估決口河身衝刷舊壩以及西南決溜隄中
土岡各處俱無庸填墊修補在案今引河既止開

十二丈所有衝決溜口仍應堵築等語查引河開
止十二丈則衝決溜口自應堵築應悉照所奏辦
理伏候

審裁

清釐奉天流民以培風俗議

乾隆戊辰

傅 恒

臣等伏思奉天乃滿洲根本之地向來風俗淳厚
後因他省民人聚集衆多遊手無業之徒襟處其
中敗壞生計漸染澆漓是以定議清查該臣等會

議得辦理奉天流民一案於乾隆五年經大學士等定議具奏奉

旨令情愿入籍者准其入籍不願入籍者定限十年令其陸續回籍等因欽遵在案又臣等前曾將詢問過蘇昌永興等辦理奉天各處流民事宜並現在將軍阿蘭泰將次到京容臣等再會同定議等因奏聞亦在案茲據將軍臣阿蘭泰稱現在數年以來分作五項辦理其商賈工匠及單身傭工五項之人為

旂民所資藉勢難禁阻原係准其居住其在奉天
年久置有產業者遵奉

恩旨予限十年現在入籍者已萬餘戶未入籍者亦屬
無幾至游手無業不安本分者即行驅逐數年來
已逐去六千餘人自願回籍者不在此數臣等查

該處流民現屆十年期滿所有商賈等項民人原
許居住外其置有產業未經入籍者雖稱已屬無
幾但現今屆期已滿十年其不愿入籍而未經飭

令回籍者未便觀望遷延應令地方官將伊等情
愿入籍確查實數速行辦理如有應行量予展限
之處聲明請

旨此外有無游手無業未經驅逐之人亦著確查辦理
無致含糊朦混至嗣後內地流民若再偷越出口
則將來辦理必致周章自應仍照原議嚴行稽查
所有奉天沿海一帶應令旂民地方官多派兵役
稽查並行文閩廣江浙山東五省督撫嚴查商船

不得夾帶閒人再山海關喜峯口等處及九處邊門俱令守邊章京沿邊州縣嚴行禁阻庶此後流民可以杜絕其源而旂人皆知敦本務業毋致稍染澆漓之習於地方風俗人心均有裨益再據永興稱寧古塔及船廠地方所有商賈工匠傭工人等約三四萬不等多係直隸河南山東山西各省之人已經入籍交納丁銀者四千二百八十六丁有地納糧者僅四百三十七戶今應令逐細嚴查

有地者令其納糧無地情愿入籍者令其納丁又查寧古塔地方因泰寧縣裁汰之後該縣糧地俱按等次分賞寧古塔官兵以致流民多藉旗田之名額外開墾荒地以圖存身而旗人亦希圖地租巧為護庇但八旗官兵向有原分地數應查明原額留與官兵並查如有原分地畝不敷養贍者令該副都統酌量留給外其下剩餘地並分賞裁汰地俱查明撤出仍著原佃之人承種徵租使各安

生業等語查寧古塔船廠等處流民除游手無業之人照例驅逐外至於有業可守未免戀土難遷如果情願入籍自宜分別納糧納丁隨宜安插但查口外餘地該處官兵多於原分地畝之外招集流民開墾荒地以致流民多借旂田之名希圖存身而旂人亦希冀廣取租利巧為護庇應交與新任將軍等澈底清釐除官兵向有原分地畝仍聽官兵自行經營外其秦寧縣裁汰糧地及一切餘

剩荒地官兵招佃收租者俱查明撤出令原佃承
種納租歸公則餘地悉登公冊流傭亦按籍可稽
應交與新任將軍核實辦理以上事宜臣等與將
軍臣阿蘭泰會議意見相同如蒙

俞允應請

敕交該部行令該將軍遵照施行

遵

旨會查奉天各屬應修城垣議

乾隆戊戌

于敏中

本月初八日欽奉

諭旨盛京為本朝

王迹肇基之地朕恭謁

祖陵道出山海關經過各處城垣多有坍塌殊不足以壯
觀瞻而資捍衛著軍機大臣會同將軍弘昫查明何
處最為緊要應行修築妥議具奏候朕發帑興工并
派員稽查督辦欽此 臣等伏查奉天各屬惟

盛京城垣每年立有歲修章程現在崇墉完固毋庸

修葺外其餘各屬城垣俱久未繕治實多傾圮其必應修築者共有一十八處但各城同時鳩工興作工匠既恐不敷稽察亦難周到臣等公同酌議請就應修各城分為三次修葺先將駐有官兵之錦州府熊岳鳳凰城並大路經行之寧遠州廣寧縣遼陽州六處較為緊要者為第一次次將中前所中後所巨流河義州鐵嶺縣開原縣六處為第二次又次將撫順海城縣岫巖廳葢州復州金州

六處為第三次其餘屯衛堡驛雖舊有城垣而地方僻小無關緊要者均無庸修葺並請

簡派督辦大員隨時往來稽查并遴派熟諳工程之員

每處一人會同將軍臣弘昫及府尹督率各屬估

計工料

奏明請帑擇日興工仍各預行度地開窰燒造磚料務期厚實堅緻足資鞏固所有臣等遵

旨會同酌議緣由謹繪圖繕摺具奏伏祈

睿鑒

請定

三陵青椿四至地界議

乾隆戊戌

和 珅

臣等恭隨

聖駕展謁

三陵俱當經奉

旨派往

陵寢週圍敬謹查勘紅椿內外一切情形臣等於紅椿外

附近地方查出舊有坟墓數處均經請

旨交奉天將軍飭令各本家速即遷移並嚴禁嗣後毋

許再行營葬及添安柵木改移紅椿俱蒙

俞旨允行在案臣等向聞

東陵

西陵凡距紅椿數十里之外尚有青椿此外方非禁地茲

查

盛京

三陵雖地勢廣狹不同而規制宜從畫一必須酌定章程
方可永遠遵行不致復滋流弊應請將

三陵週圍就各地勢酌定里數亦仍照

東西兩陵規制量增青椿一層此外方許採樵畊牧及行
走葬厝青椿以內概行禁止如有違犯各該管官
弁即行嚴查從重治罪惟各處地面廣狹臣等未
能詳悉周知無從酌定道里數目應請

敕交奉天將軍會同府尹等敬謹查明酌定四至里數

詳晰定議請

旨遵行

欽定盛京通志卷一百二十九

欽定四庫全書

欽定盛京道志卷一百三十

國朝藝文十六

奏疏

序

欽定四庫全書

欽定盛京通志卷一百三十

國朝藝文 十六

奏疏

恭篆

御製盛京賦奏 乾隆戊辰

傅恒

竊惟字學為文章之祖篆書復正草之緣指事象
形無體不備我

朝文明光啟肇建

國書得天地之元聲兼圖疇之奧旨我

皇上神姿天亶

聖學淵深制作集古今之成典謨駕虞夏而上

特命臣等將

國書仿各體篆法緒寫成字臣等祇奉

明綸欽遵辦理伏查篆文肇于頡籀沿及斯邈有五體

六體八體十體五十六種十二家之目或銘鍾鼎

或著簡編世遠年湮已多散佚今攷金石所垂尚
有三十餘體可供撫仿惟是繕寫宜有成書而典
籍浩繁博綜匪易臣等伏讀

御製盛京賦囊括羣言包羅萬彙義蘊既富字數復多
應請即以

盛京賦清漢正文繕寫各家篆體莫藉

雲漢之華用增芝蕙之重并請

特簡大臣經理其事遴選滿漢儒臣給之筆札敬謹繕

錄進呈仰俟

睿裁庶垂藝苑之鴻文作墨林之瓌寶

頒賜八體篆書

御製盛京賦羣臣合詞謝

恩奏 乾隆 戊辰

張廷玉

欽惟我

皇上

性超舜哲

道邁堯思曾攄

秘殿之毫用撰

盛京之賦望風雲之勢地是邠岐揆日月之華文同

義如固已金聲玉振擅麗藻于書林壁合璣璇播

鴻章于藝苑迺以

萬幾餘暇更搜八體諸文本大海所增加輯成蟲篆進羣工
而

指示俾協麟書麝墨模成字字龍跳虎卧魚跋寫就行

行鳳翥鸞翔爰卽三千餘言勒成三十二體在古
法則形模各列已徵淵奧于揮毫而

國書則體製俱陳尤駭神奇于運腕綜垂露懸針之
妙愈彰

御製輝煌集偃波倒薤之精益表

天文璀璨洵屬人寰所罕見允為策府之奇觀臣等久
沐

榮光復蒙

恩賜尚方捧出雀躍騰歡

中禁頒來鷓鴣行動色珍同玉檢瑞媿球圖秘在書倉
緗帙煥雲霞之彩藏諸家塾瑤函增星斗之光

頒賜

御製薩爾濟書事石刻羣臣合詞謝

恩奏 乾隆丙申

舒赫德

欽惟我

皇上紹承

祖烈闡繹

前光永惟

國家締造之模推本

烈聖艱難之緒我

太祖高皇帝誕膺

景命肇起

興京會解吉林崖之圍因有薩爾滸之戰神人協應

心德同孚提我旅數千人摧明兵四十萬撫順之

前師盡覆開原之宿將俱殲再掃寬甸之援兵爰
撫朝鮮之降帥奏

鴻勳于五日誌

皇天眷德之隆揚

駿烈于萬邦知

聖代開基之盛

皇上勤思

丕績祇適

成謨追

璿畧而神欽每懷策馬援戈之勤展

瑤遍而意切如見柳風沐雨之勤乃因金匱之尊藏未普

見聞于奕世爰

御丹毫以親製臚詳事實于當年彰

神武于古今溯前史罕儷經營之業炳

大文于天地歷億載常懷兢翼之心

垂訓于監夏監殷當承平而不忘克詰

示戒于惟休惟恤合上下而共勗其艱勒自貞珉用昭
垂于久遠

頌之祕府遍宣賞于臣鄰臣等頌

德難名服膺有志仰

皇衷之無斁守成與

創業同源捧

宸翰以交欽紀事以纂言並重

頒賜奉天文武大臣

御製薩爾澣書事清漢合壁謝

恩奏 乾隆戊辰

弘 晌

本年五月十二日奉頒

御製

太祖大破明師于薩爾澣山之戰書事清漢合壁

賞賜_臣等各一函當即叩頭祇領訖欽惟我

皇上紹聞

祖烈祇適

前光仰惟

高皇帝肇業之隆始自薩爾滸宏勲之集時也明兵連營
並進我旅分翼進攻本心德之同乎寶神人之合
應掃全師于三路膚功奏五日之間揚

大武于八旗

王基經一戰而定蓋惟

天祚德膺眷顧以啟

神謀而惟

聖績圖遵艱難以昭丕緒溯贊

謨于

皇室分勞揚同氣之休紀翊

運于元勳致果協一心之誼永念夫櫛風沐雨非締構獨

凜其艱勤思于探甲援戈雖履盛無忘克詰闡亘

古希聞之

偉績重熙耀以

天章譯

本朝世守之成書更敷宣于

國語編符聯璧共深欽佩于

瑤鈴製式同文並致敬承于

寶錄前次頒邀石刻什襲永弁乎卿班今茲捧重琅函

拜

賜復周于臣僕臣等依光

禁近宣職

陪都循盟誦而抒忱展卷頒無疆之業同服膺而感

德諧音懷永矢之情

序

前通志序

康熙甲子

董秉忠

聖天子御極以來武功震疊文教四訖幅幘式廓百度咸
熙職方輿地之書直省漸次修舉而臣秉忠以叨

簡命作尹奉天乃奉

詔偕鎮帥臣督輯通志事書成將拜手獻之

闕廷謹颺言其端曰古帝王以聖德神功膺圖受籙必

有王氣特鍾之地締構鴻基而後四表宅心大業
式闢綿寶歷於有永蓋皇天眷命靈祇協應理同
然矣我

太祖以武功肇造

太宗以文德覃敷

盛京實為發祥靈地

世祖統御萬方燕京定鼎遂為留都

皇上神謨睿畧眷念根本之邦畫疆設鎮分建州郡梯航

貢琛歛邊內附者億萬計版圖所隸聲教所敷書契以來未有加焉臣竊按

盛京乃古營州之域星躔箕尾拱長白挾巫閭襟繞滄溟跨馭大漠蓋居出震之方扼天下形勝之首也稽之昔乘未有專書若是乎地靈獻瑞鉅典聿煌端以待開天立極之

聖矣逖觀往古治化莫盛于周之成康雅頌所傳必推本古公文王岐豐之舊凡山澤險易之宜宮室苑囿

之富與夫里巷風謠昆蟲草木莫不脩悉誠以王業所自川嶽懷柔已奠宗社磐石之基而祖宗積功累仁創制立法皆裕千萬世子孫久安長治之計今

盛京固我

國家岐豐地也是志也列其山川疆土則將遡高山荒作之勤稽其建置經畫則如述考卜燕貽之旨搜其民風物產則疑進幽風七月之章予以仰副

皇上覲

光揚

烈之深心則一志而治道具焉矣受事以來早夜兢兢

國初典制之大請之部臣邊圉諮之鎮帥內地則二
三有司分歷考究為圖有九為志三十有二事舉
其綱詞規其實訂閱之餘仰見

列聖謨烈之顯赫昭融深懼固陋不文不能頌揚萬一伏
惟石渠天祿珥筆之臣必有潤色大業黼黻休明

者從茲旁搜博覽以期明備焉將

留都名勝之盛典

祖德

宗功並昭垂于奕世斯固中外臣庶所拭目欣瞻也夫

前通志序

康熙甲子

邊聲廷

國家撫有天下何以有志哉志以紀方土形勝人
官物曲迄于英賢文行上追遠古下詔來茲而已志
成獻之于上迺命詞臣裒集大書名曰一統志曰

統志以天下言也至通志則以一省言之夫不越戶庭而周知海內者志為之也我

朝自建鼎以來戡定既久

文命誕敷歷數十年而有億萬年之圖三四傳而有千百傳之緒追原厥故肇自

太祖闢土開疆繼以

太宗功德隆盛爰及

世祖正域四方今

天子宵旰圖治罔有暇逸以致六合嚮風輸誠納貢者萬國皆共球矣其幅幘之廣濶物類之茂美人民之愛戴政事之舒長高出前代駕軼隆古太平之象不待稽之載籍咸能通曉雖然藏之太府垂之奕世者志也

盛京為根本重地

帝業之所由來日昌日熾通志更不容已奉

命纂輯良已有年祇以舊籍靡稽艱于速就去年夏六月

京兆臣董秉忠甫任即檄令各屬咸至量能授事
分類采輯或稽之稗史或詢之老成更取各屬新
志增刪訂正詞尚質實義貴顯明數閱月而稿成
帙雖簡約大義悉該尋付欵劄臣聲廷職司學政
不敢以謏劣自諉間附商推它日奏之

殿廷宣之宇下舉志所列而陳之自

創基之始以至

皇圖之大自畿內之制以及邊塞之防炳耀耳目考之天

經天經如是其燦也察之地義地義如是其辨也
徵之庶類庶類如是其蕃昌也荷鋤者農橫經者
士畫疆布位置度式昭推而至于臣忠于孝友信
婦貞更至于方外遺踪避人避世無所不著也終
之以華國之事則雲漢為昭渡河作勢先典制而
後高文如是其彰彰也閱斯編者可以覽

盛京之大緊矣越歲甲子春王臣聲廷以量移

京闕卿貳之班不能待梓人之告竣而去然頌揚

發祥大業樂觀是書之成則寶鳧藻欣躍不能自己者也

前通志序

康熙甲子

張鼎彝

志何昉乎禹敷土奠山則壤城賦爰作禹貢葩經
採列國之風詞加詳焉其義一也後世風俗通食
貨志之屬皆襲其枝庶者耳然則志也者一方之
文獻也史也即所以為治也取一方之所具而縷
析之山川田賦有紀城郭宮室有紀人物風俗有
紀前言往蹟以訖昆蟲草木之微靡不有紀士君子

披卷而抽繹馬體國經野之道統是矣郡之志重乎邑省會之志重乎郡地有廣狹事有繁簡所關者大則所舉者尤職其要也况創業垂統基萬世無疆之休媿美邠岐豐鎬者乎

盛京為我

朝龍興地

太祖神武天錫攻無不取戰無不克大業于馬托始

太宗乃聖乃文任賢敷教百度釐修遐邇豫附已具撫有

寰區之概

世祖定鼎燕都天庥滋至禹甸周疆悉隸籍于職方氏要

唯宏

前聖遼左丕顯之緒也哉

皇上宵旰圖幾禮明樂備追述

祖功

宗德纂修

大清一統志以昭示來茲爰

勅奉天府尹先修

盛京通志以便彙輯為諸省弁冕粵稽往乘秦漢以
來遼地界在邊陲竹策寥寥無足異者迨遼金建
邦啟土文治未光紀載仍多闕畧明改郡縣為衛
所雖舊有遼東志兵燹之餘無復蠹簡維時幅幘
狹隘亦未有如

今日混同愛渾諸地方數千里之廣悉歸版圖者也
稽攷莫資撰述罔據是以珥筆者恒深舛漏之虞

我

皇上均知其故申

命府尹會同奉天將軍寧古塔烏拉等處凡從古輿圖所未備者咸搜採勿遺勿訛于是京兆臣董秉忠仰體

宸衷率二三守令夙夜敬勤以勦厥事不期年而告竣猗歟休哉誠千秋曠舉也臣典彛承乏典學茲土校士之暇為取其畧而三復之因思是役也非徒焜

耀史冊侈方輿之雄濶我

皇上蓋有尊

祖敬

宗勵精圖治之深意存焉志山川疆域如誦天作高山庶

無忘

祖宗祥發之有自志城廓宮闕如誦臯門應門庶無忘

祖宗締造之維艱念

祖宗分職亮采董正百司志官制恍然周官立政之書也

念

祖宗貽謀勤儉開國忠厚志風俗恍然烹葵剥棗之什也
重農勸穡不溢惟正之供則

祖宗所其無逸之宥密可法也為之志田賦崇儒重道扶
進人文則

祖宗菁莪樸棧之雅化可式也為之志學校長白鴨綠挺
秀鍾英至

本朝而天地之靈蘊無復秘藏從龍崛起一德一心

則

祖宗知人善任之睿哲可師也為之志人物若夫前言往

蹟必錄昆蟲草木必登則

祖宗寶善拜昌不貴異物之德固有無在不存者繼自今

聖子神孫紹休御極咸知取

祖宗之所以治遼者治遼且將咸知取

祖宗之所以治遼者治天下也不亦常留郵隆于

盛世乎昔韓起適魯見易象春秋嘆曰吾乃今而知

周之德與周之所以王也後之君子觀是編亦可以知我

皇清之德之盛與我

皇清之所以帝也

重刻前通志序

康熙辛卯

廖騰烽

盛京之有通志也所以弁冕諸省而誌

祖

宗之創業垂統根本鴻圖猶詩之冠以周南也其間山川

田賦城郭宮室人物風俗以及前言往蹟昆蟲草木之微靡不詳備始于康熙二十二年我

皇上纂修

大清一統志

特敕奉天府尹臣董秉忠協同鎮帥督輯成書歷有年所
臣騰燧康熙四十八年恭承

簡命尹茲東土見地勢之豐隆人民之熙皞乃知

王迹肇基

皇天之眷命有自來矣爰取通志一書朝夕披讀恍如目
覩邠岐豐鎬之盛惟是此書頒行日久印刷滋多
梨棗蒙翳臣謹會同府丞臣呂履恒治中臣李舜
卿通判臣嚴舒並府州縣臣唐之夔盧兆鵬李尚
隆等協力訂正鋟板一新因思我

太祖

太宗文德武功肇造區夏

世祖統馭萬方定鼎燕京至我

皇上以神謨睿筭式于九圍版章孔厚式廓日增而尤惓

惓于

留都首善之地

聖懷所注往往托之篇章以示其容保無疆之意是故封

山有典訓士有文蠲租有詔

東巡有詩臣于拜手諷誦之下仰見我

皇上敬天勤民孜孜無逸之心此二帝三王之所以永世

而千萬禩所宜法守者也用是齋宿繕寫敬鐫于

三十二卷藝文之首俾讀是書者知萬歲之暇留
心于士風民瘼如此繼自今

聖子神孫邈功德之崇思締造之艱振振繩繩紹休勿替

臣請誦萬年受祜之什以對揚美盛云爾

留都文萃序

康熙辛卯

呂履恒

留都文萃者予為奉天丞試士之作也歲辛卯予自

西臺蒙

聖恩擢任此職例兼學政甫下車觀風得文若干首嗣是

季有考月有課越明年壬辰春歲試兩郡彙而集
之名為文萃謂人文之所聚也天地翕而萬物生
上下交而治道成學行合而文教興是故觀其所
聚而見人文之大全也哉

皇上堯仁舜智稽古右文光華復旦之治媿隆唐虞而
聖學日新無時不以教養為務惟茲

留都乃

國家發祥之地風雨會和之區其土博厚其俗敦龐

其民質直故其為文也清而能淳秀而不佻加以
官茲土者自尹若丞而下咸思仰承

德意以收儒效漸摩日久蒸蒸日上變予不敏猥承諸君子
後夙夜祇懼罔敢隕越是以從龍之裔人才輩出
即各學人士亦彬彬可觀竊思文教武功隨時異
用皆帝王御世之權而移風易俗之大機也昔者
周室盛時辟靡鐘鼓四方攸同因之重熙累洽遂
卜年世之遠論者謂周治尚文較夏商為明備不

知周之先祖父公劉太王之世其尚忠質也久矣
我

國家受

天景命

列聖相傳肇基

興京恭惟

太祖高皇帝知勇天錫保世滋大規模洪遠

太宗文皇帝創制顯庸光大前烈立學校行釋奠禮美哉

始基何文治之隆也欽惟

世祖章皇帝以聖神文武之資奄有九州定鼎燕京導民
養士皆可為萬世法程幽岐豐鎬之盛遠過姬周
而太和之在宇宙咸萃于

聖主之勲華矣夫源之遠者流必長根之茂者發必盛易
曰觀乎人文以化成天下恒之彖曰聖人久于其
道而天下化成十五國風以二南為始基縣之九
章推本受命之原而必以疏附後先為蹶生之助

然則制藝之文其即古者言揚之典而學校之臣
所由以人事君者乎且言者心之聲文者行之素
也士有才能而不遇有司之過也時方郵隆而學
不布聞亦士之恥也用是拔其尤者授之剏例俾
海內人民知

聖天子之欽明文思化成有本而

陪京之風會三韓之才藪所以鍾聚于東北而發揚
于天下者其來有自蓋乾高坤厚之氣生長乎震

然後巽齊于東南而萬物兌悅焉則

國家萬年之景運于是乎徵而世有知言者亦將于
此覘多士之器識而決其所成就豈徒競勝藝林
取悅當世云爾哉

續修通志序

雍正乙卯

王 河

恭惟

世宗憲皇帝聰明睿知文武神聖時勤宵旰懋登上理董
正治官則百僚師師而庶績熙也敬教勸學則多

士濟濟而文治隆也秉耒者慶豐年而享含哺之
樂懋遷者遠服賈而懋考養之心固已風俗醇良
遐邇如一百昌茂對中外皆同矣夫位天地而育
萬物者太平之象也圖王會而採風謠者邳隆之
規也周重邠岐漢尊豐沛者王業之所由基也書
陳禹貢禮載職方者輿圖之所自始也伏惟

本朝一統志典制所昭久有成書今經數十餘年化
與日新治偕時懋規畫益加宏遠采輯更宜精核

聖慮周詳爰

詔直省重加增訂次第獻之

闕廷俾珥筆諸臣會萃成帙用揚盛美

臣河荷承

恩命督學東土兼署尹篆值

盛京通志尚未告竣謹率所屬分類纂輯凡幅幘之廣生

齒之繁文物之盛制度之詳莫不備載並前志或

遺者亦旁搜博訪悉為增入自夏至冬五閱月而

稿就值奉天府尹臣宋筠到任相與商榷論定而

各處覆詢之事與遠徼之所當詳者又以次俱到
因復集原纂緝諸臣細加校仇益為增補又七閱
月再易稿而後成校閱之餘見

王業之所起與

王化之所成蕩蕩巍巍際天蟠地有非筆墨之所能罄者

馬蓋自長白鍾靈鴨綠毓秀

太祖

太宗武功文德炳耀寰區

世祖定鼎燕京東西南北無思不服遼東
發祥之地尊為

留都

聖祖六十餘年久道化成淪肌浹髓

世宗憲皇帝觀光揚烈仁育義正者備及周至而

盛京根本重地尤厯

睿懷雖漸被無涯而化行有自則恩膏與遼水皆流聲施

共閭峯並峙宜乎山川風土載

至治之光動植飛潛播太和之象者矣今

聖天子統承丕緒孝治光昭凡所以宅中保泰者億萬
年日進無疆斯

天庥洊至亦億萬年日進無疆豈止

發祥之地德洋恩溥即山陬海澨日見淑氣殷流仁風

翔洽我

大清一統之盛其與清寧並久也夫

欽定盛京通志卷一百三十